



Ehemaligenverein Schulheim
Schloss Erlach 3235 Erlach

JAHRESBRICHT vom Presi 2021 / 2022

„Äs chunt eso, wie's chunt..... u mängisch angersch, aus me meint....“!?

Üsi 10. Hauptversammlig (HV) isch anno 2021 wäge dr Coronazyt vom März i Juni verschobe worde. Das isch ä guete Entscheid gsy, wo mer am 13. Juni 2021 d'HV mit 30 Persone ufem Seemätteli düregfühert hei, hei mer nämlech sunnigs Wätter gha u mir hei nachem „Zäme-Rede“ no äs chllys, freis Seemätteli-Träffe chönne gniesse. :-)

A dere HV vom 13. Juni 2021 si bsungers d'Verabschiedig vom Ueli aus Presi u Brichte usem Schueuheim im Zäntrum gschlange, usegschtoche u berührend gsy.

Dr Urs Anliker het z.B. verzeut wie usefordernd d'Coronazyt im Heim isch gsy, z.B. hei d'Ching nümm chönne heifahre oder äs si keni Bsüech im Heim mügliche gsy!

Was wyter ganz schwierig isch gsy: isch ds lange Verfahre vor Privatisierig vo de fuf kantonale Chinder- u Jugendheim. Z'Erlach het das lengeri Zyt zur Verunsicherig im Heim gfuehrt u z.B. viu Personauwächsu zur Foug gha.

Am 17. Juni 2021 hei viu betroffni Mönsche ufgschnufet: I de Medie isch publiziert worde, dass dr Bärner Grossrat ds Gschäft vor Versäubschtändigung vo de fuf bärnische Chinder- u Jugendheim vom Tisch gfägt het. Äs isch um nes paar Schtimme gar nid ersch uf ds Gschäft ygange worde! :-)

Am 06. Novämber 2021 hei mer üsi 35. Vorschtangssitzig abghaute u drufabe ds Jahresabschlussässe gnosse. Das isch für üs aube wien ä Anerkennig u Wärschetzig vo üsere Arbeit.!

Was mache mer eigetlech aube i dene Vorstandssitzige? Z.B. Termine vo zukünftige Fescht oder Sitzige abmache. D'Finanze tschegge (Jahresbyträg, Schpände i Freizytfonds, üse Kontoschtand, Vereinsmitglieder-Schtand). Äs zusätzlechs Traktandum isch denn gsy: Wär vo üs nimmt im OK vom 150 Jahr-Jubliäumsfescht vom Schueuheim Schloss Platz? Oder wär tuet dr Jahresbricht-Bytrag 2022 schrybe?

Am 16. Juni 2022 hei mer üsi 36. Vorschtanssitzig düregfühert, z.B. isch d'Organisation vom Seemätteliträffe im Summer 2022 agschlange, z.B. wär het weli Charge? Wär, wo u wenn muess ds Salatbuffet, Getränk, u.a.m. bschteut u organisiert wärde?

Was üs scho lenger ou beschäftigt u schtört, isch, dass üse Teiu vor Schloss-Websyte ou nach mehrere Alöif u Afrage nid aktualisiert worde isch! **(das isch z.B. ou nachezläse im Protokoll vor 10. HV, 13. Juni 2021).** I ha de usegfunge, dass äs ä Personauwächsu git oder gä het u di aktuell Bsetzig zur Zyt chrank gschrybe isch!

Ds Seemätteliträffe vom 14. Ougschte 2022 het by schönschem Wätter schtattgunge. Mir hei ds Apéro im Schlossgarte düregführt u zwe Schtung speter isch ds Brätle ufem Seemätteli gschtartet worde. A üsem 20jährige Ehemaligevereins-Jubiliäum im Summer 2020 hei mer uf dä prächtig Apéro-Ort wäge Rägewätter no müesse verzichte u drum hei mer Fröid gha, dass mer ds Ritual no hei chönne nachehole! Es git vo mir us z'Erlach, kei schönere Ort für nes Apéro.....:-)

Bym Blockhus si mer mit feine Düft empfangen worde u hei chönne häresitze, ds feine Salatbuffet vo de Seeländerburefroue u ds Fleisch vom Schponsor u Grillmeischer Rico teschte u beguetachte....Dr Hans, dr Heinz u dr José hei tatchräftig für Gescht gsorget. Wie scho immer isch ds Zämesitze schön, ungerhautsam u schpannend gsy, vor auem de no bym Gaffee u Dessärt ässe, wo's würtlech zu „Sitzläder“ het chönne cho.....:-) Zure unverhoffte Überraschig isches no cho, wo dr Fritz no mit dr „Chauffeuse Susanna“ ä späte Bsuech ufem Seemätteli gmacht het.:~)

Die 37. Vorschtandssitzig hei mer am 19. Novämber 2022, wie gwohnt im Schloss abghaute un üs drufabe uf üsi „kulinarischi Belohnig“ ire feine Beiz gfröit..... :-)

Jitze möcht i no gärn ä Dankes-Rundi dräje:

1. DANKE am Schulheim Schloss/Urs Anliker&syne MA, dass mer dörfe hiesy, yglade u ungerschtützt wärde! :-)

2. MERCI am ganze Vorschtang, für öie Ysatz, öies Engagement, Mitdänke&Würke! :-)

3. Härzleche Dank a aui Vereinsmitglieder u Schponsore. Liebi Vereinslüt, dir syt die, wo häufe, dass mer aui „DA-SY“! :-)